



15. august 2019

UKA 2019/87

Inatsisartut Suleriaasianni §33 naapertorlugu aalajangiiffigisassatut siunnersuut imaattoq matumuuna saqqummiuppara:

Inatsisartut inatsisaanni Inatsimmut § 2, stk. 1 ”nipilersornermi tunisassiornerup” ilassuteqaatigineqarnissaa pillugu Naalakkersuisut siunnersuuteqaqqullugit peqquneqarnissaannut Inatsisartuni aalajangiiffigisassatut siunnersuut, nunami inuutissarsiornerup siuarsarneqarnissaanut atatillugu nipilersornermi tunisassioriaatsip siuarsarneqarnissaa anguniarlugu matumani nipilersortartut inatsisitugit illersugaasumik atuisinnaanissaat anguniarlugu inuussutissarsiornermi aningaasaliiffigineqarnissamut periarfissaqarnerannut ersarissaanerussaaq.

(Inatsisartunut ilaasortaq Aqqalu C. Jerimiassen, Atassut)

Tunngavilersuut:

Ullumikkut Kalaallit Nunatsinni ilisimasatsitut pikkorissorsuarnik nipilersortartoqarpoq, piginnaasaqarluartunik nunanilu allani unammillerluarsinnaanissamik periarfissalinnik.

Taamaakkaluartoq nipilersortartut periarfissaannik killilersuivugut, aningaasaliiffigineqarnissaannik, ineriartornissaannik, kiisalu allatuulli namminersortutut ingerlatsisinnaanissaannik, nipilersornerup silarsuaata kulturimut kisimi attuumassuteqartumik aqqissuussinertut isiginerasigut killilersuilluta.

Tulluusimaarutissaasinnaagaluarpoq nipilersortartutsinnut aallartisaanissamut aningaasaliiffigineqarnissamut qinnuteqarsinnaaneq ersarinnerusumik piariarfissaasuuppat. Aningaasaliineq angalanernut aammalu Kalaallit Nunaanni ataasiakkaanik saqqummersitsinernut atorneqarsinnaasoq. Aningaasaliineq tamanna tassaassalluni Kalaallit Nunaanni nipilersoriaatsip nunarsuarmioqataasunut ilisaritinnissaanut avammullu niuerutiginnissaanut periarfissiisoq.

Nunat tamalaat akornanni nipilersortitseriaaseq isiginnaartullumi pitsaassutsimik ilisimaarinnilluartuupput, pitsaanerpaallu kisimik periarfissaqarput. Piumassuseq annertoq imminullu piумаaffigisinnaaneq allanut unammillersinnaassagaanni nipilersortartuni piusariaqarpoq. Nunatsinni nipilersortartut taamaattut pigereeraluarlutigit avammut nipilersoriaatsip nunarsuarmi ersarissarnissaanut angalanissamut aningaasartuutit annertungaatsiarput. Ullumikkut nunatsinni nipilersortartut sinittarfimmini immiussisarput saniatigut aningaasanik naatsorsuutissaqarnatik, arlalialunnguillu kisimik annertuumik aningaasartuutilinnik tunisassiornissamut 100.000kr.-it tungaanut tapiiffigineqartarlutik. Taamaakkaluartorli nunarsuarmioqatitsinnut sanilliullugu ilaatigut millionilippassuarnik aningaasatigut naatsorsuutissaqartartunik suunngillat, amerlanertigut aningaasat ussassaarinnermut, angalanernut musikvideonullu atorneqartarlutik.



Nipilersorneq niuerfissuuvoq nunarsuaq tamakkerlugu isiginnaartoqarfiulluni: suliffeqarfissuaq milliardit tungaanut kaaviiartitaqarfissuaq peqataaffigisariaqagarput. Nipilersoqatigiit soorlu Nanook nunarsuarmi ilisimaneqarlualersinnaapput aningaasatigut tapiiffigineqarnermikkut, aammattaarli allaqarpoq eqqumiitsuliarpalaartunik saqqummersitsinernik nunarsuarmi periarfissaqarlualerunerusunik, soorlu Yenso. Kalaallit Nunaannut nuuteeqqanik 100.000-ikkaanik tunisaqarnikkut aningaasanik isertitaqarnissamut periarfissarujussuaq aammalu Kalaallit Nunatsinnik takornariaqarnikkut ussasaarilluarneq, pinngortitarsuarmik kusanartumik takussutissiineriinnaangitsoq aammali nunatut piorsarsimassutsip eqqumiitsuliornerullu iluani pisuujusutut nittarsaassinerusoaq.

Matumani pingaaruteqarluinnarpoq nipilersorneq tunisassiornerut tamakkiisumik isigissallugu, nipilersortartup inuuniutigalugu nipilersortartuunera imaluuniit inuuniutiginninneraa apeqqutaatinnagu. Tassami nunami maani nipilersortartut annerusumik minnerusumilluunniit sunngiffimminni sapaatip akunnerisalu naanerini aallarnisaasutut nipilersornermik aallussisarmata. Taamaattumik nipilersornerup silarsuaa ataatsimut isigalugu suliffeqarfissuuartut isigissavarput, kiisalu immiussinerit tunisassiornerut.

Inatsit allanngortinneqarpat nunani allani nipilersoriaatsip nittarsaanneqarsinnaanissaanut aningaasaliiffigineqarnissamut qinnuteqarsinnaanerup periarfissaanera nipilersortartunut erseqqissaatigineqassaaq.

Aalisagaq ataasiaannarluni pisarinqarsinnaavoq, ataasiaannarlu aamma nerineqarsinnaalluni. Aatsitassat ataasiaannaq tuniniarneqarsinnaapput. Kisiannili nipilersuut nuannarilluarneqartoq qaqugumut piusussaavoq, qaqugumut tusarnaarneqarsinnaalluni, kiisalu millioneriarlugu tuniniarneqaaqattaarsinnaalluni. Aammattaaq taalliortoq/erinniortoq ataasiaannarluni nipilersuusiorneq ajorpoq, taannaavorli nutaaliorinnaanermut aqqutaasoq qaqugumulluunniit imaaginnarneqarsinnaanngitsoq. Politikip silarsuaani suliassarput tassaavoq nipilersuutit taakku nunarsuarmi nittarsaanneqarsinnaanissaannut sinaakkusersuinissaq.

Pisortanut aningaasatigut allaffissornikkullu kingunerisassat

Matumani suliniutaasut Greenland Business aqutigalugu suliarineqassapput, taamaattumillu inatsimmi allaqqasup annikitsumik allanngortinneqarnerani annertunerusumik allaffissornikkut kinguneqartussaangilaq, matumani Greenland Businessip kiffartuussinerimi isumaqatigiissutit atortitaasa iluini aaqqinneqarsinnaammata.

Namminersorluni ingerlatsisunut aningaasatigut allaffissornikkullu kingunerisassat

Soqanngilaq.

Innuttaasunut aningaasatigut allaffissornikkullu kingunerisassat

Soqanngilaq.